

REFLESI AVAN NOU AL VOTE

Avan nou al met nou trwa lakrwa, tia bon nou fer enn retour an arier, nou examinn bien seki finn ariv nou ek nou pei. Li inportan nou reflesi bien, parski sa pou ena enn linpak lor sinkan kipe vini, pou nou pa resarye enn fardo ki nou'nn deza sarye e rekonn mem soufrans.

Kan nou get dan retrovizier, ki nou trouve ? Eski nou finn al delavan, ouswa nou finn retourn an arier ? Normal, si nou zis get otour nou, nou dir « *wi finn ena progres* ». Larout, nouvo batiman, pon, lopital, dispanser, klinik tousala inn monte. Me ofon, eski sa inn amelior vreman nou lavi ? Eski nou pe santi nou pli alez, eski nou pe manz pli bien, eski nou ena enn meyer lasante, enn meyer ledikasion ki oparavan ? An rezime eski nou santi dan nou profon enn leta zeneral bienet ? Eski nou nivod vi inn ogmante ouswa nou santi nou pli dan pins ? Eski nou ena linpresion ki pe tret nou parey kouma ninport ki lezot sitwayen, ouswa nou santi koumadir nou bann etranze dan nou prop pei ? Dan enn sertenn manier, eski nou pa santi ki pou tel ou tel rezon, ena diskriminasion kont nou ek nou zanfann ?

Si repons la li « *Wi* », pouki rezon nou pa gagn drwa gagn mem sans, mem tretman ki lezot morisien ape gagne ? Sinkan desela nou finn vot bann depite pou ekout nou e defann nou lintere. Eski ofon, nou gagn linpresion ki zot finn ranpli zot rol, ki nou bann dirizan finn govern nou pei a nou satisfaksion ? Ki zot finn met bann sistem anplas e sanz lalwa pou rann sak sitoyen pli lib, ogmant sanz tou dimounn pou enn meyer lavi, permet sakenn exprim-li ek so bann preokipasion e sirtou ranfors la demokrasi, protez drwa sak sitoyen ninport kot li trouve ou kominote ki li apartenir ? Eski bann nouvel ki nou tande toulezour, sa rann nou ere ou bien rann nou tris e fer nou dezespere ? An gro eski nou satisfè dan lansanb avek manier ki'nn amenn nou pei ?

Anou pran enn de lexanp anou analize. Tou lesemenn nou tann bann aksidan grav kot dimounn perdi lavi brit. Larout inn vinn deplizanpli danzere parski lotorite pa finn pran aksion ki bizin kan ti bizin e zot pena okenn plan valab pou asir nou sekirite lor larout. Nou obzerve ki finn konstrir boukou larout, pon tou kalite model, inn fer gro det inn met metro, me lor larout ena touzour anbouteyaz, partou touzour bloke ki li B Bassin, Q Bornes, Curepipe, Vacoas ou Port Louis.

Sitiasion ladrog inn vinn dezesperan, ziska zanfann lekòl primer finn tom ladan. Koripsion napa koze, tou lesemenn nou tann skandal, depans exazere, pasdrwa, proteksion tikopin, mem dan parlman nou trouve kouma nou depite ki nou reprezantan pa lib pou koze, pe gagn met deor brit brit pou ninport ki rezon banal par kikenn ki mank manier, zis parski tel kestion ou remark pa fer plezir bann dan govt. Preske tou institision zordi inn met dimounn ki mars ar zot e lorla bel lapey par san, desan mil. Finn devid tou lakes ki ena, inn andet pei ziska 600miliar. Apre inn donn *Agalega* pou gagn kas ar *Lenn* pou balans bidze pei. Lepep inn fatige get tousala e li anvì respir enn ler pir, enn ler ki pa polie ar tout sort magouy.

Fek-la nou finn aprann enn ta sekre gras a bann video « **missie moustass** ». Nou tou morisien nou'nn soke, nou ti panse bann zafer koumsa trouv zis dan fim. Nou parfetman dakor ki pa gagn drwa anrezistre dimounn san so permission, me si nou pa ti tann sa ar nou prop zorey, nou pa ti pou krwar. La, saki interes nou, sepa kisannla ki'nn fer sa ou ki mwayen inn servi ? Non, seki interes nou, se saki nou finn tande ladan, eski tousala vre ? Nou tann bann konplo, bann magouy, bann falsifikasion rapor medikal, bann langaz kominal e mank respe – Sa tradir enn mepri total anver lapopilasion ek nou krwayans relijie. Tousala dan enn langaz meprizan ki extreman grosie e blesan. Sirtou ki li inplik bann personaz ki okip bann pos kle avek bann ot responsabilite dan pei. Nou gagn linpresion pe gagn zafer ek bann vwayou dernie degre, ki desid detou dapre zot kapris. Zot mem pran lor zot pou ralanti ou koup internet san pran an konsiderasion ki ena bokou lantrepriz ki inposib fonksione san koneksion.

Dan boukou pei bann konportman parey, li konsidere extremman grav e sanksion ti pou fini aplike. Pa gagn konpran kouma levek katolik inn les li tranp dan zot zwe. Kouma vit vit koumsa avan enn lanket aprofondi, inn permet enn « **personaz grosie** » koumsa vinn lor peron leve e tir foto laba. Me aster ki **erer-la fini komet**, partou kot **linn met so bogi**, bizin lav **ar grand delo ek zavel** pou anlev tou mikrob. Apre-sa alim *lansan kretien* dan tou kwin pou repous « *tou sa bann lespri pirat ek ler malsin* » ki'nn swiv li laba – parski *pena pon sispandi ant paradi ek lanfer*. Deza bann kretien finn bien ankoler akoz finn ofans **NOU MAMA**, si nou pa ti konn gard nou kalm, konn kontrol nou lemosion, depi lontan ti pou fini *kone kot sinwa plant petar*.

La pena pou pitie person, *pa vot ni blok, ni pie banann, ni krokodil, ni dinozor*. Twa ti lepep to ena enn gran rol pou zwe dan sa eleksion-la, tou regar pou lor twa la, to parey sa zwer ki pe tir penalty pou sov so lekip dan defet. Tou prozeker pe vir lor twa la, tou kamera, tou lizie, to pena drwa fer erer sa fwa-la. Pa les narnie detourn to lespri, dekonsantre twa, distrer twa. Pa get ni agos ni adrwat, to regar bizin zis dan kare poto, pa ayer, to regar bizin pli for ki *lazer superman*. Pa ekout diskour bann dinozor, bann manipilater, bann *misie konn tou*, bann ki pas diber. An realite sa bann-la zot get zis zot lintere, la pou vi'nn dir twa « *Get bel devlopman nou'nn amene, get progre ki nou'nn realize e nou pou fer ankor plis dan lavenir* ».

Me eski to realize komie finn rant dan zot pos, komie zot, ek zot lantouraz inn manze ler pe donn kontra. Narnie napa finn gard pou twa ladan e twa sak kou to nek pe lev pavion, asiste miting, pe pran zot pou to lerwa. Mazine komie lapey, komie lavantaz, komie *allowance*, komie voyaz, komie privez zot pe zwir lor to non ek to lasier e lorla pa pey okenn tax - **tou duty-free**. Anplis pa zis zot ki profite, me ousi tou zot fami ek bann tikopin. Enn veritab mafia organize pou profit rezilta to travay, nou tou nou travay alor ki anmemtan pe touy nou zanfann ar ladrog. Fode to avoy enn mesaz for, enn *boulet kanon ki defons zot file*, lame gorli bizin brile si rod bare.

Depi lindependans pe vann rev ar nou, e asak fwa nou finn tom dan zot piez. Inn fer sa pou abriti twa, anpes twa trouve kot to lavenir ek to bienet etc. Nou'nn fer konfians, me finn trair nou konfians e finn servi nou. Narnie pa finn sanze dan to lavi. Tou legramatin tonn bizin rebran to katora, to dipin zasar, to sak ledo pou al to boulo. Tou lemwa tonn bizin ris diab par lake pou zwenn ledebout, avoy zanfann lekol, tir to rasion ek pey to bann bil. Narnie pa finn sanze.

To kouzin kinn kit pei inn al *Canada, Langleter* ouswa *Lostrali* inn pli malin ki twa. Lor enn period vintan linn vinn trwa kat fwa Moris e lorla amenn kado tou pou twa. Linn amenn twa dan lotel e fer twa promne dan loto. Twa enn sel fwa to pann resi al rann li enn vizit. Twa isi, si ena pou pey enn taxi al lopital ou al vizit to fami sa debalans to bidze. Poz twa la kestion, ki kalite lavi to pe amene ? Ki kalite lanfer to pe viv ? Nek dwa labank, dwa ceb, dwa kart kredi, dwa agos dwa adrwat, to enn esklav modern, to boul dan lame kapitalis ek politisien. Enn pe viz to portmone, lotla li pe viz to vot pou li amize. Twa volonter, to nek done mem.

Eleksion mo frer se pa enn match futbol, kot to parie lor enn lekip apre ler match fini, to lev pavion, to krie « *Weh, mo lekip inn gagne..* » - lerla bat ravann, fer fet. Mazine lekip ki pe gagne la, li ena enn pouvwar lor to portmone, lor to lavenir ek lavenir to zanfann. Seki zot deside dan parlman ena enn lefe lor twa, lalwa ki pe vote laba transform to lavi, kapav rann li pli amer - **swa paradi swa lanfer**. Pa nek kontant to lizie ar bel batiman, bel magazin, zoli sime, loto deklas alor ki narnie napa pou twa. Travay pa pou twa, loto pa pou twa, obze lix to pa kapav aste. Sipermares mem to pe tike pou aste, to nek mete-tire lor letazer telman tou pe vinn pli ser. De zour-an-zour tou ape monte, nek to lapey ki pe res anplas. Sak fwa to gagn ogmantasion, pri lartik double. To apel sa progre twa ? Vomie letan margoz ? **Aster dernie ler, pe vinn anbet nou ar katorziem mwa, ar tout sort promes**.

Listwar aprann nou ki si enn dimounn inn fer enn kitsoz enn fwa, li pa pou ezite pou refer li ankor. Dan lepase finn ena soupson trikaz dan eleksion. Nou bien kone ki tou kalite trik kapav servi. Ar nou

lizie nou ti trouv enn pake kitsoz ki pa normal ditou. Biltin drese kare kare (swadizan avek lareg), bwat biltin *fer piti* dan lasal, bwat ranpli dan karo kann, kamion biltin ariv biro depouyman apre eskort ki tipe swiv li, biltin promne dan lanatir, biltin Port louis aterir dan bwat Rose Hill, kamion minicipalite ek katkat sarye biltin san okenn eskort. Bizar sa kantite biltin anplis kinn prepare dan enn limprimri prive par dismil san kone kinn fer ar sa. Saki pli soka, se sa bann ka ki pena okenn esplikasion. La pa zis computer me kalkilatriss tou eklate. Par exanp dan no3 ena 15 798 electer me ler fer depouyman ena 15951 biltin (153 anplis), no5 parey 48 777 electer, gagn 910 biltin anplis, no18 ena 33 210 electer, gagn 3 sirplis. Swa ena biltin ilegal ki'nn azoute, swa inn mal konte e bann sif-la pa fiab. Kouma sa posib ? Eski appel sa « *free and fair elections* » sa ? Samem bokou nepli krwar dan eleksion e pa al vote. Pa koz bann obzervater internasional, zot trouv zis saki anv montre zot.

Komiser elektoral li, li dir twa ki li pa kapav partou alafwa. Konklizion nou tire, seki dan so lekip pa tou dimounn kapav fer konfians. Fim « **Proposition indécente** » (*avek Robert Redford*) fer nou reflesi lor sa size-la, **ki sak dimounn ena so pwin feb**. Parey kouma sak materio ler redi li, ena enn moman kot li kase, *imen ousi parey*. Ena pou vann twa ar mil rounpi, tandik ki enn lot li napa pou bouze *tank to pa met milion lor latab*. Kom di koze « *Met for gagn for* ». Kas, lavantaz, later, loto, pos travay, tousala sanz lide dimounn, souvan li sanz ousi so kouler palto. *Bef dan disab sakenn get so lizie*, sirtou *bann ki zot lizie pli gro ki zot vant*. Dan sa pei-la ena kapav vann zot nam odiab si zot ena kitsoz a gagne ladan, mem si li zis bann miet ki'nn tom anba latab. *Kok li drese li fer so gard avou ler soley leve, e li sante pouki soley ekler so destin ek so fami toultan*. Li aste twa apre li vann twa, li get zis so lintere. Twa, kan to lizie pou ouver pou to konpran ?

To pankor konpran ki depi 56 zan pe mont dadak lor to ledo, to pankor konpran, sa *power game* ki pe deroule anplin lizour devan to lizie. Ena enn klik derier rido ki zot, fode zot gagnan toukou, ki li pil ki li fas zot lor *gounn*. Sa bann-la zot pena leta dam zot, fode zot lor to latet *toultan kife*. Twa to touzour pe atann ki enn misie prop prezante lor so souval blan, ki enn « *sevalier san tas e san repros* » dibout pou twa, defann to lintere e to gagn sok ler vann twa. Person ladan pa pou dibout pou twa. Fode to rod enn parmi to group ki konn to mizer, ki konn to problem, ki sorti dan to lanvironnman. La ousi, bizin ekler tors lor so figir, examinn li bien, tansion li enn zida.

Si to pa debat, to pou res touzour derier midi, to pou res toultan dan napa. Kifer to krwar tou sa avoka, dokter, mazistra, zournalis, sindikalis-la pe galoupe, pou prezant zot dan eleksion - Ladan to gagn osi dokter ek avoka san soulie. Fer lebien fer lemal, li enn desizion personnel. Li pa depann lor ledikasion, lor pratik relizie, si sorti dan bon fami. Li kler osi ki bann pos kouma lapolis, avoka, mazistra ou minis pa vedir ki lame prop. Parfwa frekantasion zwe, me ladrwatir li depann plis lor konsians lapersonn konserne.

Depi plizir lane, gro gro lelefan pe pas devan nou lizie. Komie skandal nou finn tande, wakashio, air Mauritius, molnupiravir, tipapie, traktopel, bonbonn gaz, planting ladrog, defile raptor *Franklin, rave party, sniffing*, revelasion *lafer Kistnen*, polisie degize an fakter, nofraz bato *Sir Gaetan*, detournman fon dan lapolis, vol dan labank, « Deal mama-piti ». Fami *Dalton* kot papa-piti kokin labank par milion apre pa kondane - enn gagn promosion lot grasie. Kouma tortir dimounn dan prizon ziska lamor apre deklar swisid. Trafikan ek reprezantan lord mars lame dan lame, fer biznes 50-50. Polisie ek politisien bwar, fer aksidan e mem touy dimounn me zame kondane. Marsan pwason amene ladrog dan pei me deklar inosan parski zot gagn proteksion lotorite. Depans miliar lor drin, me sak fwa linondasion partou nwaye, miray simitier tonbe kadav rant dan lakaz. Bann minis ki deklar pli kone ki direkter meteo, lerla katastrof, loto flote kouma bato dan *Porlwi*.

Depans exazere pandan konfinnman, laparey *Pack & Blister* ki napa marse me kas zame finn rande. Komann medsinn par *kinkayri ek bizoutri*, fleris ki instal kamera infrarouz. Lamor bann dialize, fon *NPF, CSG, Covid* ek tout sort fon solidarite ki'nn fonn dan soley. Tou sa miliar ki'nn detourne atraver

MIC ou ki'nn zet dan dilo pou finalman andet nou pei ziska lagorz. Eski nou kapav kontinie koumsa ? Ou appel sa enn gouvènmman serie ou ? *Pena pli aveg ki seki pa anvi trouve.*

Tou aktivis, zournalis ou avoka ki denons zot, met tilapoud kot zot, ferm zot, pini zot pou zot aret koze. Axel Cheney, Al Khizr Ramdin, Murvind Beetun inn persekite, finn anpes zot fer zot travay. Finn aret avoka kouma Rama Valayden, Roshi Bhadain, Akil Bissessur. Finn ferm Bruno Laurette, Darren Seedeal pou zot ferm zot labous e res trankil. Ler nou get tousala nou fini par konpran ki nou anplin dan diktatir.

Kan ti fer kart biometrik ti met nou an gard kont bann deriv koumsa. Ki arive kan kre enn « **Population Database** ». Tou pei ki'nn fer sa inn konn mem problem, nou rappel ki'nn ariv *Lafrik disid, Lalmagn ek Rouanda*. Sa sistem-la ek so « *safe city* » li fasilite ek permet retrase, arsele e instor ladiktatir. Zordi popilasyon realize ki Dr Madhewoo ti ena 100 % rezon. Kopie sistem indien Aadhar, li pa enn bon lide ditou. Sa sistem-la inn fer dega laba e nou sistem inn fer dega isi. Li donn lokasyon bann deriv, li meyer detrir sistem-la pou rann morisien so liberte mouvman e so drwa dexpresion.

Tonn tande tomem, **missie moustass so bann revelasion**. To lespri pankor ouver mem ? Pe pran nou pou bann inbesil, pe pran nou pou boufon ; nek pe repet nou komputer-sa, robo-sa, AI-sa. Asterla robo konn zoure, konn respire, konn touse, konn vir paz, konn riye tou ? Pe koz manti ar nou toulezour parski tou koulev pe fer nou avale. Kan enn dimounn manter, eski to pou kontinie krwar li ? Dan bann video-la nou trouve kouma li met so *nene pwint* dans tou zafer. Kouma li mel li ar lanket lapolis, zafer lakour, *STC*, li fer manipilasyon partou - Komsa pena lalwa, pena regleman pou li. Se li ki fer lalwa kouma li anvi e oblize ekout li. Kouma li espionn tou dimounn dan pei. Personn napa sape, mem bann avoka, bann ziz, so prop minis ek bann anbasad, tou pase. Tousala li bien grav, sirveyans a grand esel koumsa ? - Sa li anti-demokratik e li ilegal. **Zot delir fransman pena limit - James Bond mem fel divan zot**. Aster nou finn gagn konfirmasyon indirek kipa zis enn « *survey* » ki'nn deroule dan *Baie des Jacotets*. Nou'nn konpran ousi pou ki rezon ti pe insiste pou nou re-anrezistre nou kart sim, se pou kapav espionn nou inpe pli bien. Saki zot inn fer la li osi grav ki « **Watergate** », kot prezidan **Nixon** ti bizin demisione akoz li ti plas mikro dan biro lopoziyon. Isi pe fer *by-looke* ar popilasyon antie, apre vinn dir nou robo-sa, *Intelizans Artifisiel*, « AI-sa ».

Tou sa ki pe arive-la fer gagn per. Deza dan lepase ti pe rod met enn lekipman pou filtre tou saki pas par internet dan Moris. Rezman bann gran firm kouma *Google*, *Mozilla* ti tir sonet dalarm, ti ekrir lotorite lokal pou dir zot « **pa fer sa** », parski sa pou koz enn debalansman e mank konfians lor nivo internasionnal. So rezon, seki zordi zour lemond antie servi internet pou kominike ek fer tranzaksion. Bokou lavwa inn leve dan nou pei mem e pa finn al delavan. Me li sanble ki finn rod enn lot sistem, enn sime koupe pou espionn nou, e tou saki nou fer lor rezo. Tou dimounn aster inn vinn mefian tansion pe ekout zot, pe vey zot - Ar kisann-la zot koze, kisann-la zot avoy mesaz, kot zot kont labank ete. Boukou gagn per pou avoy kas lor *internet* ou koze lor *whatsapp*. Nou tande deza dan radio ki ena kliyan labank inn perdi zot lapey. Labank pann trouv narnie apar propoz zot enn loan ziska lanket konplete. Pourtan ena ladan pena ***ni Internet Banking, ni Juice***.

Zour vandredi nwar kan rezo sosio ti sansire lepep ti bien ankoler. Sa finn bien afekte nou moral. Enn ta biznes inn bloke e zot sif dafer inn tombe. Tourist, etranze ek investiser finn ena enn lopinion bien negatif lor nou pei. Detrwa gran firm zot valer aksion inn tombe plis ki 10% akoz sa. Inn blok rezo sosio pou bous nou lizie, anpes nou trouv laverite, parski tou zot pese pou deor. Lepep pe trouve ki zot koupab konplo avek *sirkonstans agrave*. Dan boukou pei sivilize appel sa « **ot traizon** ». Dan listwar nou kone ki sanksion ***ot traizon*** se « *lapenn de mor* ».

Sa eleksion-la, fer enn manier ou napa res lakaz. Pa dir : « **Mo vote , mo pa vote, sa pa pou sanz narnie** ». Kan to pa vote savedir ki to abandone e to les sime lib. To pe donn lot kote plis pouvwar lor twa, pou li kontinie fer madia, pou li mont dadak lor to ledou. Mazine ki 25% popilasyon pa al vote sak

fwa. Si to fer parti ladan, se bann kouma twa ki fer ladiferans ant 3me ek 4me kandida ki eli, parfwa diferans-la li zis 100 vot parfwa mwins. To kone tomem ki etranze vote dan sa pei-la. Dimounn mor, malade, seki dan lopital, bann ki andeor pe etidie ou ki'nn emigre « **zot osi vote** ». Boukou ki pa dan Moris ankor lor lalis elektoral. Eski to konpran bien ki mo pe dir twa? Dernie nouvel, dan *kirpip* pe promet 25mil bann dimounn ki pret zot kart idantite zour eleksion. Napa dir to pa ti kone, si to pa konpran, dimann bann ki konpran. Dir zot explik twa kouma sa deroule, e se pa premie fwa ki sa arive.

Met dan to latet ki li vital ki tou dimounn bizin al vote. Nou tou bizin reponn prezan, so lipie-fermal, so andikape, **tou dimounn san eksepsion**, pena okenn eskiz akseptab. Sak vot konte, si tou dimounn dir « *enn vot pa pou fer bel diferans* », bwat-la pou res vid. Pa fer pares, **amenn to kontribision pou sanz nou sosiete**. Gete kouma pou fer, si bizin mars ar beki fer li, si bizin pous fotey roulan fer li. **Anou met lake depi sinker di matin ar nou parasol, nou dipin griye ek nou dilo mor.**

Ou bien kone lemal exis, tansion zis sa zour-la soley pas ba, lapli koumans tombe, tou bis gagn pann, nou bizin prepar nou atou kan nou gagn zafer ar lespri dimal. La *li enn kestion lavi lamor*, kitfwa dan desanzan ki enn lokazion parey pou prezante ankor, sa zour-la personn parmi nou pa pou la pou refer listwar. Pli gran sanzman bizin opere dan nou latet, lerla ki pou ena veritab sanzman. Nou bizin servi lespri, pa nek galoup kouma souval fou, nek swiv lamas kouma mouton. Pa pran kont bandrol, pavion ek oriflam. Twa fer to devwar, to kone ki bizin fer.

Vote li pa zis enn drwa, li osi enn devwar

Mark listwar, le 10 novam leve gramatin boner, amenn to plim, marse si bizin, me al fer travay-la.

Fer li pou to zanfana, fer li bien dan lamanier

Enn morisien an alert